

որով եւ ընդունել էին:

Դուրսը խոր գիշեր էր արդէն:

Ես նայեցի շուրջս. ամեն բան նոր էր թուում ինձ ու անծանօթ, կարծես բոլորովին մի նոր քաղաք էի ընկել:

Փողոցները դատարկ էին բոլորովին. ճամփան լուսաւորում էր իր դողդոջուն, աղօտ լոյսով մեր թղթէ մեծ լապտերը, որ կախւած էր կառքի առջեւից: Ամենից շատ ինձ զարմանք էր պատճառում տների մեկամաղձոտ ու սառն տեսքը:

Ցերեկը նրանք բոլորը բաց էին ու կենսալից. իսկ այժմ պատերը պինդ քաշած ու փակած, լուռ ու հանդարտ, առանց կեանքի մի նշոյլի. ո՛չ դուռ, ո՛չ պատուհան, նաւահանգստում իրար կողքին ու իրար վրա շարւած ապրանքների արկղների պէս:

— Խիսունջը մտել է իր պատեանը. — լսեց իմ ետեւի կառքից ընկերներն իս մէկի մեղմ ձայնը, կարծես նա վախենում էր խանգարել շրջապատող լռութիւնը:

Ջինը վազում էր անընդհատ, լապտերը ճօճ էր գալիս իր միակերպ, տխուր լոյսովը:

Աչքերս յառել էի այդ լոյսին, որի մէջ հոլի պէս պտոյտ էր գալիս Դեկտսկէ-սանի կայտառ կերպարանքը, ծիծաղում էր, ծռմուռում, ժպտում ու փոփոխւում, այնպէս կենսուրախ, այնպէս անփոյթ ու մանկական անհոգութեամբ:

Ու չը գիտեմ՝ ինչո՞ւ, մի խոր տխրութիւն իջաւ վրաս:

Ի՞նչ է դառնալու բնութեան զւարթ աղջիկը մի քանի տարի յետոյ: Գուցէ մի փայլուն գէյշա՝ հռչկաւի, ամբողջ Ճապոնում տարածւած: Գուցէ մի կոմս կամ իշխան կին վերցնի նրան, քանի որ ճապոնացու համար նշանակութիւն չունի